

## Inyarubha ye embere ya Paauru kwa Timoseo Ubhukangati

Inyarubha yinu yandikirwi na Paauru. Akamwandikira umuntu wunu aari arabhirikirwa Timoseo. Timoseo akasabhuka kunzira ye emeremo ja Paauru, necho kigiriyi Paauru arabhirikira Timoseo, umwana waazi wa amaheene mubhwisirirya. Timoseo akagenda na Paauru momeremo myaru ju ukurwaza Ing'ana Inzumu iguru wa Yisu Kiriisitu (Amahocha ga Abhatumwa 17:14-15, 18:5). Hanu Paauru aari akiiri araandika inyarubha yinu, akamoha Timoseo emeremo ju ukwimwiririra abhiisirirya murubhiri rwa Efeeso.

Kinu chagiririyi Paauru aandiki inyarubha yinu, yaari kubhukurira Timoseo chimbu ikwenderwa korobhora na kwija abhaangariri na abhasakirya bha risengerero. Paauru akeenda abhaangariri bhabhi bhagururuku bhu umwuyu, bhiji amaheene ne eteemwa inzumu kwa abhiisirirya. Na abhaangariri bhabhi na amanaga gu ukwanga amiija guusi gu ururimi. Ikitabu cha 1 Timoseo kina amang'ana maaru ganu gakusakirya abhakangati bha amasengerero siku zinu kwimwiririra amasengerero gaabhu.

*Amakeeren'ya*

<sup>1</sup> Inyarubha yinu nandikiri inyi Paauru. Inyi nitumirwi kubha umutumwa\* wa Yisu Kiriisitu, kwiswaja rya Mungu Umusabhuri wiitu na Yisu Kiriisitu ubhwisigi bhwiitu.

<sup>2</sup> Nirakwandikira Timoseo, umwana waani wa amaheene mubhwisirirya.

Ibhigangi no omorembe kurwa kwa Bhaabha Mungu na kwa Yisu Kiriisitu Umakuru wiitu, bhibhi na naawi.

*Amaangiriji iguru wa amiija gu ururimi*

<sup>3</sup> Hanu nabhuukiri kuja icharu cha Makiduniya, nikakusabha wiikari kurubhiri rwa Efeeso. Nikakusabha, korereke ubhareche abhaatu bhanu bhakwija amiija gu ururimi.

<sup>4</sup> Ubhareche bhatigi kugwatirira amaganu ganu gataana bhwera, na kwinyaacha kwitonda amariina ga bhasukuru, ganu gataana tiniru. Amang'ana gayo guusi garareeta zihaka, gatakusakirya abhaatu kwisirirya Mungu, chimbu ubhwindi bhwazi bhwa ukusabhura abhaatu.

<sup>5</sup> Ubhwindi bhwa amaswaja ganu ni-kubha, abhiisirirya bhabhi nu ubhisiigi bhu umwuyu mwiru, egoro nziru nu ubhwisirirya bhwa amaheene.

<sup>6</sup> Nawe abhiija abhandi bhagatigiri gayo, bhiichuriri, bhasikiiri kugamba amang'ana ganu gataana bhwera.

<sup>7</sup> Bhareenda kubha abhiija bhi imigiru† ja Musa, nangabha ganu bhakugamba na kukandikija, bhatagizi.

---

\* **1:1 Umutumwa.** Kumaragirira bhukung'u, rora ring'ana abhatumwa muKiniibhasa. † **1:7 Abhiija bhi imigiru.** Kumaragirira bhukung'u, rora Ikiniibhasa.

<sup>8</sup> Nawe itwi tuminyiri imigiru ja Musa ni-mizamu, aribhi umutu aragituna chimbu ikwenderwa.

<sup>9</sup> Na toreenderwa komenya imigiru gitatiirwi kobhe eheene, nawe kubhanu bhakukira imigiru na kubhaangi, bhanu bhatar abhiisirirya na bhu ubhubhi, kubhanu bhatakwigwa Mungu na kubhabhi, kubhanu bhakwita bhawiisi na bhaunina, na kubhiiti bha abhaatu.

<sup>10</sup> Na gitatiirwi ku bhi itaaru na bhanu bhakokora abhasubhi abhakindichabhu ncha abhakari, kubhiitigi bha abhaatu nu ukubhagurya mubhutumwa, abhabhihi, na kubhiirahiri bhu ururimi. Imigiru gitatiirwi kumang'ana guusi ganu gatakwigwana na amiija gu ubhuhuru.

<sup>11</sup> Amiija gayo, gahaabhoneka muNg'ana Inzumu, yinu ikwerecha ubhugungu bhwa Mungu wu urubhangu rwasi. Amang'ana gayo nego nahirwi na Mungu niraariki.

### *Urubhangu rwa Yisu Kiriisitu kwa Paauru*

<sup>12</sup> Nirakumya Yisu Kiriisitu, Umukuru witu wunu aang'iri zinguru, ku kubha akamenya moronge na akandobhora kubha omohocha waazi.

<sup>13</sup> Nangabha niiziri kumutuka na kanyaacha abhaatu bhaazi, na naari musigi, nawe akandorera ibhigangi. Akakorabhu, ku kubha naari nirakora gayo kobhogege na nitaari nu ubhwisirirya.

<sup>14</sup> Ni ibhigangi bhyu Umukuru Yisu Kiriisitu bhikakiraho kwa niinyi. Na akang'a ubhwisirirya nu ubhusigi ku ukugwatana neewe.

<sup>15</sup> Ring'ana rinu ni-rya amaheene, na ereenderwa kwisiriribhwa bhukung'u, "Yisu Kiriisitu

akaaza kuusi kusabhura bhu ubhubhi.” Ku bhayo, niinyi nikariri ubhubhi kukira bhushi.

<sup>16</sup> Naurubhu, Yisu Kiriisitu akandorera ibhigangi! Akanyeerecha ubhwigumirirya bh-wazi kwa niinyi kukira abhandi bhushi, korereke nibhi ekerenjo kubharya bhakumwisirirya na kusung’aana ubhuharu bhwa kemerano.

<sup>17</sup> Mungu newe Umutimi wunu ataana itiniru, atakukwa, na atakororekana, newe umwene. Ewe anu ubhusuukwa nu ubhugungu kemerano. Garami.

*Paauru araswaja Timoseo kugwatirira amaswaja*

<sup>18</sup> Timoseo mwana waani, nirakoha riswaja riyo, kuring’aana na amang’ana gu ubhuruti ganu gaagambirwi iguru waazu. Amang’ana gayo gabhi ebheseme bhyazu kwitana rihi bhwaheene.

<sup>19</sup> Ugwatiriri ubhwisirirya ne egoro nziru. Abhaatu abhandi bhasiihiryi kokora garya bhizi ne-heene riyo rigiriryi kutiga ubhwisirirya bh-wabhu.

<sup>20</sup> Mubhaatu bhayo arimu Himinayo,‡ na Arikizanda. Bhayo nibhatigiiri Shitaani§ korereke bhijibhwi, bhatigi kumatuka Mungu.

## 2

*Amiija iguru wu ubhusingiri bhwa risengerero*

<sup>1</sup> Mmbe, ubhutangi bhwa guusi, nirasabha mubhi murasabha iguru wa abhaatu bhushi,

---

‡ 1:20 2 Timoseo 2:17-18. § 1:20 Nibhatigiiri Shitaani, enzobhooro yaku ni-Paauru akaanga kong’eha kugwatana na abhi-isirirya mwisengerero.

kumasabhi ga teemwa zuusisi. Na mubhi marakumya Mungu iguru wa abhaatu bhuusi.

<sup>2</sup> Irabheenda kusabhira abhatimi na abhandi bhuusi bhu ubhunaaja, korereke twikari komorembe, turiikara chimbu Mungu akwenda na kokora ganu gakwindibhwa mubhutangi bhwazi.

<sup>3</sup> Ring'ana rinu ni izumu, na rirazomera Mungu Umusabhuri wiitu.

<sup>4</sup> Ewe areenda abhaatu bhuusi bhasabhurwi, na komenya amaheene.

<sup>5</sup> Areho Mungu wumwibhu, nu umwigwan'ya wa abhaatu na Mungu ni-muutu wumwibhu, newe Yiesu Kiriisitu.

<sup>6</sup> Ewe akahurucha ubhwikari bhwazi umwene, korereke asabhuri abhaatu bhuusi. Bhanu nebhwe ubhuminyikiriri bhanu Mungu atuhiri, kwibhaga rinu atiiri.

<sup>7</sup> Na ku kubha yiyo, niinyi natiirwi umurwazi nu umutumwa. Niragamba ga amaheene, nitakugamba rurimi. Natiirwi kubha umwija wa bhanu bhatar Abhayaahudi, korereke nibhi niraraarika ing'ana yu ubhwisirirya na amaheene.

<sup>8</sup> Kugayo, ahagero huusi hanu mukwibhiringa kumasabha, nereenda abhasubhi bhanungi amabhoko iguru kumasabha. Bhakorebhu kubhwindi ubhuzumu, bhasabhi bhatiigatini naabha kuhakaana.

<sup>9</sup> Ihuiibhu nereenda abhakari bhiibhohe koteemwa yinu ikwenderwa, bhabhi ne eteemwa nzumu ne ekerengo. Bhatasiga ubhwagi bhwa kuniga zinzwiri, hamwi bhwa kwibhoha ebhegero bhyi izahaabhu na bhinu bhikabharya,

hamwi zengebho za riguri ikuru.

<sup>10</sup> Nawe bhabhi ne eteemwa nzamu chimbu ikwendwa kubhakari bhanu bhiisiriiryi kukumya Mungu.

<sup>11</sup> Hanu abhakari bhakubha bhariiga, bhabhi bhiikumu na bhiitigiriri.

<sup>12</sup> Nitakubhaha abhakari umweya gwa kwija nuru kukangata abhasubhi, nawe bhabhi bhiikumu.

<sup>13</sup> Nirabhugabhu, ku kubha Mungu akakangata kubumba Adaamu, akumara Haawa.

<sup>14</sup> Na Adaamu atakangiririibhwi, nawe umukari newe akangiriribhwi, akakira umugiru gwa Mungu.\*

<sup>15</sup> Nawe, abhakari bharasabhurwa kunzira yu ubhwibhuri bhwabhu, ariibhi bharang'eha kanaga mubhwisirirya, ubhasigi, ubharindu na kubha ne eteemwa nzamu.

### 3

#### *Ubhwera bhwa abhaangariri bha risengerero*

<sup>1</sup> Ring'ana rinu ni-rya amaheene, "Umuntu wanu areenda emeremo ju kubha umwangeriri wa risengerero, wuyo igumbiri emeremo imizamu."

<sup>2</sup> Mmbe, umwangeriri wa risengerero, abhi umuntu wanu ataana isoro. Abhi musubhi wa mukari wamwi, abhi we ekerengo, naatu wa amang'ini, umuntu wanu akusuukwa, mwerya koro, nu umuntu wanu yizi kwija.

<sup>3</sup> Atabha munywi, atabha mwamani, abhi manyuhu wu ukusiiga omorembe. Na atabha masigi wa mpirya.

---

\* **2:14** Rora Ubhutangi 3:1-6.

<sup>4</sup> Abhi umuutu wu ukwimirira bhwaheene in-yumba yaazi, wunu yizi kotongera abhaana mo-teemwa yu ubhwisirirya nu ubhusuuku.

<sup>5</sup> Ariibhi umuutu aratamwa kwimirira in-yumba yaazi umwene, aranajabhw kuriibha abhaatu bha risengerero rya Mungu?

<sup>6</sup> Na atabha umuutu wunu isiriiryi Mungu haguhibhu, ataaza kwiheema. Kuyo karamokora atinirwi chimbu Shitaani\* aatiniirwi.

<sup>7</sup> Nawe, abhi umuutu wunu akomenyeeker-erwa bhwaheene nuru na abhatamenya Mungu, bhataaza kuririirirwa na kahaatibhwa mwiheto rya Shitaani.

### *Ubhwera bhwa abhasakirya bha risengerero*

<sup>8</sup> Abhasakirya bhusi, bhabhi bha teemwa nzumu, bhabhi bhagaruruku, bhatabha bhanywi, bhatabha hasigi bha mpirya.

<sup>9</sup> Nawe, bhabhi abhaatu bhanu bhakugwatirira amaheene gu ubhwisirirya bhwitu kwa koro nziru.

<sup>10</sup> Bhayo hinga bhagemwe. Na bharaarorekani bhataana isoro, neho bhakore emeremo giyo.

<sup>11</sup> Kwiki abhakari bhaabhu† bhabhi bha teemwa nzumu, bhatabha bhagubhi bha abhaatu, bhabhi ne ekerengo no obhoronge mumang'ana gusi.

<sup>12</sup> Abhasakirya bhabhi nu umukari wami, na bhabhi bhariimirira bhwaheene abhaana bhaabhu na abhandi bhanu bhari munyumba yaabhu.

---

\* **3:6 Shitaani.** Kumaragirira bhakung'u, rora Ikiniibhasa.

† **3:11 Abhakari bhaabhu,** ubhagaruri abhandi bharatara kubha, abhasakirya abhakari.

13 Bharya bhakokora emeremo ja ubhusakirya bhwaheene, bharabha bharasuukwa. Hayo bharabha na ubhukararu bhwa ukuragan'ya ing'ana yu ubhwisirirya bhanu bhuri kwa Yisu Kiriisitu.

*Amaheene gu ubhwisirirya bhwit*

14 Nirakwandikira amang'ana gayo, nangabha niriisega kuuza kwa naawi haguhibhu.

15 Nawe niraakeezere, uramenya ganu gakobheenda abhaatu kokora munyumba ya Mungu. Abhaatu bhayo nebho risengerero rya Mungu wu ubhuhuru, na risengerero neryo imbiru na ubhuruza bhwa amaheene.

16 Amaheene ganu Mungu irikiryi, ni-ga ama-teemo, nego ni-ganu:

Kiriisitu akiyereken'ya kumubhiri,  
akirikinibhwa ne Egoro kubha moronge.

Akarorekana kwa bhamaraika,‡  
akarwazibhwa mubhyaru bhyusi.

Akiisiriribhwa kuusi yusi,  
akagegwa kuja iguru mubhugungu.

## 4

*Abhiija bhu ururimi*

1 Nangu Egoro iragamba itakubhisa, muzisiku za rusizu, abhandi bharatiga ubhwisirirya bhwa amaheene, na kutuna zekoro zu ubhukangirirya, na amiija ga Shitaani.

2 Amiija gayo, gariijibhwa abhabhi, abhabhihi bhanu zekoro zaabhu zikuuri zangi nkina zachirwi ni ichuma cho omorero.

‡ 3:16 **Bhamaraika.** Kumaragirira bhukung'u, rora ring'ana maraika muKiniibhasa.



<sup>3</sup> Bhayo bhararecha abhandi bhatigi kukwira, hamwi kurya ibhyakurya ibhindi. Nawe Mungu akabhibhamba korereke bhisung'aanwi kubhukumya na abhiisirirya, ku kabha bhizi amaheene.

<sup>4</sup> Ebhegero bhyusi bhya Mungu, ni-bhizamu, kitareeho cha kwangwa. Bhyusi bhisung'aanwi kubhukumya,

<sup>5</sup> ku kabha ebhegero bhiyo bhibhingukiibhwi ni ing'ana ya Mungu na amasabhi giitu.

*Omohocha umuzamu wa Yisu Kiriisitu*

<sup>6</sup> Uraabhahi abhiisirirya bhusi amija ganu, hayo neho ukabha omohocha umuzamu wa Yisu Kiriisitu. Na urabha uririrwi bhwaheene mumaheene gu ubhwisirirya bhwitu na mumija amazamu ganu ugatuniri.

<sup>7</sup> Utaani na amaganu ganu gatari ga Mungu ganu gataana nzobhooro, nawe wiinaryi kwikara chimbu Mungu akwenda.

<sup>8</sup> Iminyikini, "Kunarya umubhiri kobhona amanaga, kunu ubhwera bhusuuhubhu. Nawe, ukwinarya kwikara chimbu Mungu akwenda, kunu ubhwera bhwa teemwa zusi, ku kabha rinu riratoha ubhuragi bhwo okobhona ubhuhuru bhwa nangwinu na bhanu bhukuuza."

<sup>9</sup> Ring'ana riyo ni-rya amaheene, na abhaatu bhareenderwa kurisung'aana.

<sup>10</sup> Riyo neryo rikugirya turiikong'ererya na kokora emeremo kumucha, ku kabha taramwisega Mungu wu ubhuhuru, Umusabhuri wa abhaatu bhusi, kinda bhanu bhakumwisirirya.

<sup>11</sup> Amang'ana gayo, ugiji na kugaswaja.

12 Umuntu wawusi atakorega ku kubha awi ukiri mumura, nawe okore umucha ubhi ekerenjo kubhiisirirya kukugamba, koteemwa, kubhisiigi, kubhwisirirya no obhoronge.

13 Kora umucha kosomera abhaatu Amaandiku Amarindu, na urwazi nu ukwija, kuhika hanu nikuuza iyo.

14 Utatiga kohokerya ubhunaja bhanu Mungu akuhiiri kuhitira amang'ana gu ubhuruti, hanu watirirwi amabhoko na abhiimiriri bha risengerero.

15 Ugwati amang'ana gayo, korereke abhaatu bhusi bharore umucha gwazu mubhwikari bh-wazu.

16 Wangariri eteemwa yaazu na amijja gaazu, na ong'ehe kokorabhu. Hanu okokora gayo uriis-abhura awi aumwene na bhanu bhakukwitegeera.

## 5

### *Amaragirira kubhiisirirya*

1 Utakanya umukaruka, nawe omotongere chimbu ubhaatongera wuusu. Abhamura ubhatongere ncha abhahiiri bhaazu,

2 abhakari abhakikuru ncha onyoko, na abhaacha ncha abhasubhaati bhaazu. Okorebhu kumwayu mwiru.

3 Usuki abhakwirwa bhanu bhataana musakirya.

4 Nawe ariibhi umukwirwa wawusi ana abhaana hamwi abhazukuru, bhayo bhiigi kusakirya abhahiiri bhaabhu. Bharaakorebhu, neho bhakuriha abhiibhuri bhaabhu amazumu

ganu bhaabhakuriri. Ibhunimbu Mungu akwenda.

<sup>5</sup> Umukari umukwirwa wanu ataana umuntu wu ukumusakirya, wuyo ariisega Mungu, arasabha ubhusakirya kwa Mungu ubhutiku nu umwise.

<sup>6</sup> Nawe umukwirwa wanu asiigiri amang'ana gi isi, wuyo akuuri nangabha ararorekana mahuu.

<sup>7</sup> Amaswaja gayo, ubhabhuriri abhiisirirya, koreke bhatabha ni isoro.

<sup>8</sup> Nawe umuntu wuwusi wanu atakusakirya abhaatu bhaazi, kindabha yika waazi, wuyo arabha atigiri ubhwisirirya, nabhiri mubhi kukira umuntu wanu ataana ubhwisirirya.

<sup>9</sup> Umukwirwa ariisiriribhwa kubha mubhwindi bhwa abhakwirwa, ariibi ani imyaka kutangira merongo isaasabha, naatu abhi aari nu umusubhi wumwi.

<sup>10</sup> Abhi wu ubhukumya ubhuzumu kumahocha gaazi amazumu. Abhi aririri abhaana bhaazi bhwaheene, abhi aginihiryi abhagini, abhi ahukiryi abhiisirirya ko kobhooja amaguru gaabhu, abhi abhasakiiryi bhanu bhakunyaakibhwa, nabhi akuriri amahocha guusi amazumu.

<sup>11</sup> Nawe abhakwirwa abhaacha, utabhiisiririrya kusikira mubhwindi, kubha inamba yu umubhiri irabhahiza kukira kwihurucha kwa Kiriisitu, bhayo bhareenda kukwirwa.

<sup>12</sup> Muriyo bharabha bhiiritiri zitirira, kubha bhatigiri ubhuragi bhwabhu kwa Kiriisitu bhwa ukusaaga bhaguru.

<sup>13</sup> Abhakwirwa ncha bhayo, bharanara eteemwa yu ubhutubhu, bharagendagenda muzinyumba za abhaatu. Kwiki, bharabha

bhagwatan'ya na bhariisikirya māmang'ana ga abhandi, inu bharagamba ganu gatakwenderwa.

<sup>14</sup> Mmbe, inyi nereenda abhakwirwa abhaacha, bhabhi bharakwirwa, bhiibhari abhaana na kwangarira zinyumba zaabhu, korereke abhabhisa bhitu bhatatema amasoro.

<sup>15</sup> Rora kubha abhandi bhamariri kubhura na kutuna Shitaani.

<sup>16</sup> Ariibhi umukari umwisirirya ana abhakwirwa mubhishoko bhyazi, abhasakiryi. Akorebhu, korereke risengerero ritigi kuhizwa, neho risengerero rirabha nu umweya gwu ukusakirya abhakwirwa abhandi bhanu bhataana ubhusakirya.

<sup>17</sup> Abhiimiiririri bhanu bhakwangerira risengerero bhwaheene, bhasuukwi na kokorerwa amazumu,\* kindi bhanu bhakwihurucha kwerekeererya na kwija.

<sup>18</sup> Nirabhugabhu, ku kubha yandikirwi maMaandiku Amarindu, “Eng’ombe hanu ikuhura inganu, utayebhoha umunywa.”† Na yandikirwi, “Omohocha areenderwa kurihwa ubhurihwa bhwazi.”‡

<sup>19</sup> Utiisirirya ukugambwa kumwimiiririri wa risengerero, ukiri kubha na bhomeyeekererya bhwa abhaatu bhabhiri hamwi bhatatu.§

<sup>20</sup> Nawe abhiimiiririri bhanu bhakukaja kokora ubhubhi, ubhakanyi mubhutangi bhwa bhusi, korereke na abhandi bhubhahi.

### *Amaangiriji kwa Timoseo*

\* **5:17 Bhasuukwi na kokorerwa amazumu** kuKigiriki ni-bhasuukwi manga kabhiri. † **5:18** Rora Amahiityu gi Imigiru

25:4. ‡ **5:18** Ruuka 10:7. § **5:19** Rora Amahiityu gi Imigiru 17:6, 19:15.

21 Nirakuswaja mubhutangi bhwa Mungu, na mubhutangi bhwa Yisu Kiriisitu na bhamaraika abharobhorwa, ugwatiriri gayo, utatinira kwa bh-wangu hamwi kuhingirira urubhaara ramwi.

22 Utiisirirya kwa bhwangu kutuurira umutu amabhoko komeremo ju Umukuru, ku kubha uraaturi umutu umubhi momeremo giyo, na naawi urabha ugwatini mubhubhi bhwazi. Awi wiyangariri, korereke usaagi moronge.

23 Kutangira nangwinu, awi utanywa amanzi ageene, nawe ubhi uranywa ni idivaayi\* hasu-u, iguru wu ubhurwiri bhwazu bhwu inda na amarwiri agandi ganu gakukenyaacha.

24 Abhaatu abhandi, ubhubhi bhwabhu bhararorekana habhwiru, nuru bhukiri kutinirwa. Nawe abhaatu abhandi, ubhubhi bhwabhu bhwiibhisiri, bhararorekana ibhaga rindi.

25 Ihuiibhu, amahocha amazumu gararorekana habhwiru. Na garya gaari gakiri giibhisiri, garabha habhwiru.

## 6

### *Amaswaja kubhambusa abhiisirirya*

1 Bhambusa bhusi abhiisirirya, bhasuki abhakuru bhaabhu, korereke iriina rya Mungu na amiija gitu gataregwa.

2 Bhambusa bhanu abhakuru bhaabhu ni-bhiisirirya, bhatabharega ku kubha ni-bhahiiri. Nawe bhareenderwa kubhakorera bhwaheene na kukiraho, ku kubha bharabha

---

\* 5:23 *Idivaayi*. Kumaragirira bhukung'u, rora ikiniibhasa.

bharasakirya abhiisirirya abhakindichabhu, na ni-bhasiigwa bhaabhu. Amang'ana gayo ugiiji na kubhakandikija.

*Amiija gu ururimi nu ubhuniibhi bhwa amaheene*

<sup>3</sup> Bhareho abhaatu bhanu bhakwija amiija gu ururimi. Bhariija ganu gatakwisiriran'ya na amiija gu ubhuhuru bhwa Umukuru witu Yisu Kiriisitu, na gatakwisiriran'ya na amiija ganu gakukangata abhaatu kwikara chimbu Mungu akwenda.

<sup>4</sup> Bhayo bhiizwiri ubhwiyingi, na bhatiizi ryaryasi. Abhaatu bhayo bharuumiraku zihaka zinu zitaana bhweru iguru wi ihing'ana ihisuuhu. Na gayo gahaakora eng'eera, iryumaana, amatuki na amiisiigi amabhi,

<sup>5</sup> naatu siku zausi garasarya ubhwigwani. Abhaatu bhayo bhasarikiri amang'ini, bhataana amaheene. Bhariisega ukwikara chimbu Mungu akwenda neyo inzira yo okobhonera ubhuniibhi.

<sup>6</sup> Maheene, ukwikara chimbu Mungu akwenda kuragirya amautu abhi muniibhi bhukung'u, ku kubha karamokora bhimwisi bhinu anabhyu.

<sup>7</sup> Garibhu ku kubha, mauti mauti tutiiziri na chuchusi, na tutakubhuka na chuchusi.

<sup>8</sup> Mmbe, ariibhi tuni ibhyakurya na bhyu ukwibhoha, twiswi na bhiyo.

<sup>9</sup> Nawe bhanu bhanu umwau gu ubhuniibhi, bharagwira mubhitiimotiimo, na kahaatibhwa mwiheto, na mumwau gwe ekegeege. Umwau guyo garabhasarya kuhika bhariki.

<sup>10</sup> Ukusiiga bhukung'u zimpirya nekwe abhutangi bhwa ubhuhubi ubhwaru. Abhandi

bhasigiri zimpirya na bhahabhiri, bhatigiri ubhwisirirya, nangu bhanu ubhusungu bhwaru nchu amutu wanu akwisoma ne ekegeso.

### *Amaangirijwa kwa Timoseo*

<sup>11</sup> Nawe awi, amutu wa Mungu, ugang'ose gayo. Utuni amaheene, wiikari chimbua Mungu akwenda, ubhwisirirya, ubhusigi, ubhwigumirirya nu ubhusuuku.

<sup>12</sup> Ubi nu umucha kutuna Mungu nuru ibhi bhukang'ubhwi, korereke ugwatiriri ubhuhuru bhwa kemerano. Ubhuhuru bhuyo nebhwe wabhirikiriirwi, hanu wiisiriiryi ubhwisirirya bhwa za mubhutangi bhwa abhaminyikiriri bhaaru.

<sup>13</sup> Nirakuswaja mubhutangi bhwa Mungu wanu akoha ubhuhuru ebhegero bhyasi, na mubhutangi bhwa Yisu Kiriisitu wanu aahurukiryi obhome-nyeekeererya bhwa amaheene mubhutangi bhwa Pantiyu Piraato, kabha,

<sup>14</sup> ugwatiriri amaswaja gayo kwa kugisirirya, utabha ni isoro, kuhika hanu Umakuru witu Yisu Kiriisitu akuuza.

<sup>15</sup> Ukuuza kwazi karabha ribhaga rinu indiri Mungu. Mungu wa urubhangu rwasi, na amakangati umwene, newe Umutimi wa abhatimi na Umakuru wa abhakuru.

<sup>16</sup> Ewe, newe arabha iikiri mubhwiru bhanu amutu atakura kubhwisukira. Na atareeho amutu wanu amuruuzi, nuru wanu akutara komorora. Ubusuuku na amanaga gabhi kwewe, kemerano. Garami.

<sup>17</sup> Ubhabhuriri abhaniibhi bhatigi kwikumya, nuru kwisega ubhuniibhi bhwabhu bhwi isi yinu, bhunu ni-bhwi ibhaga isuuhu. Nawe bhiisege

Mungu wanyu akotoha ebhegero bhyusi kwe ekoro nziru, korereke tobbehokerye kwa bhozomerwa.

<sup>18</sup> Na ubhabhuriri bhakore amazumu, neho bhabhi abhaniibhi mumahocha amazumu. Bhabhi bha koro nzumu na kugwatan'ya na abhandi ebhegero bhyabhu.

<sup>19</sup> Ko kokorabhu, bhariiturira ikibhumbiku kinu kikubha ubhurusa ubhunagu kuzisiku zinu zikuuza. Hayo neho bhakusung'aana ubhuhuru bhwa amaheene.

<sup>20</sup> Timoseo, gwatirira bhwaheene ing'ana ye eheene yinu wahurwi. Utigi kwisikirya mumang'ana ganu gataana nzobhooro yuyusi. Kwiki utiisikirya na zihaka ze ekegeege, zinu abhandi bhakubhuga nezo ubhuminyi.

<sup>21</sup> Abhaatu abhandi bhanu bhagwatiriiri gayo, bhatigiri ubhwisirirya bhwabhu.

Ibhigangi bhibhi hamwimwi na niimwi.



**Ubhuragi Ubhuhya Mukigambũ chi Ikikiizũ  
Ikizu: Ubhuragi Ubhuhya Mukigambũ chi Ikikiizũ (New  
Testament+) for Tanzania**

copyright © 2024 Wycliffe Bible Translators, Inc.

Language: (Ikizu)

Contributor: Wycliffe USA

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-03

---

PDF generated using Haiola and XeLaTeX on 3 May 2025 from source files dated 3 May 2025

cfe4772f-9f09-59a0-b72b-3863d6657553